



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliorvm Omnivm Generalivm Et Provincialivm Collectio Regia**

Ab anno DCCCLXXII. ad annum DCCCCIX.

**Parisiis, 1644**

Epistola XXVII. Ioannis Papae VIII. Ad Carolvm Calvvm Imperatorem.  
Commendat Vvigbodum Parmensem episcopum.

**urn:nbn:de:hbz:466:1-15967**

in Christo tractare ac tegere perpetuo satagentes, apud eos commendare assiduis precibus studeamus, & vestri memoriam ad sacrosancta corpora ipsorum semper deponere satagamus. Latamur autem & iocundamur in Domino, quia beatam vos & felicem dicent omnes generationes; quia pio committente coniuge tam salutiferum ministerium assumpsistis: per quod scilicet & in præfenti sæculo nomen bonum, quod est super diuitias multas, & caeleste acquiretis inter angelos, & non finiendum imperium. Data XVI. Kalendas Decembris, indictione x.

## EPISTOLA XXVII.

## IOANNIS PAPÆ VIII.

AD CAROLVM CALVVM IMPERATOREM.

Commendat Vvigbodum Parmensem episcopum.

*Ioannes episcopus Carolo imperatori.*

**Q**VIA desiderandam nobis, & totis viscerum brachiis amplectendam dilectionem vestram nihil patimur ignorare eorum quam maxime, quæ ad cumulum gloriæ vestri noscuntur culminis pertinere, operæ precium duximus innotescere, Vvigbodum venerabilem ecclesiæ Parmensis antistitem apostolorum adiisse limen, & sedem, tam orationis voto, quam inveniendæ per nos vestræ gloriæ desiderio; cuius mentis arcana subtilius inuestigantes, nos plane minime latuisse fatemur: quod & nunc sinceræ fidei erga pium imperium vestrum habendæ teneatur affectu: & hoc iam olim procul dubio rerum effectibus demonstrasset, nisi sibi esset a piæ memoriæ priori principe causâ talis iniuncta, quam sine sui discrimine floccipendere nequiuisset. Vnde rogamus, data venia suscipite nunc illum vt mea viscera: quia & si forte quondam vobis erat inutilis, nunc autem vobis & nobis utilis: quamuis forte non sit dicendus inutilis, qui fidem ante promissam custodiens, simile circa vos seruandæ fidei dedit indicium: præsertim cum sperans in Domino non perdiderit, si mutauerit, fortitudinem, dum scilicet nobis hunc informantibus, si quopiam contra vos vsus est, pro vobis proponat iam totis viribus exercere. Vnde non dubitamus illum se

fortiorem erga fidei vestræ constantiam exhibendum, quam fuerit, quando contra imperium vestrum perhibebatur sentire. Ergo clementissime imperator, quia ab infantia creuit vobiscum miseratio, recipite illum tamquam ab ipsa beati Petri apostoli patroni vestri confessione, & super eo mercedem habere contendite, non imputantes ei quod nouissimus venerit: quia & bonus ille paterfamilias operarios vndecimæ horæ pares fecisse describitur his qui tertia hora venere. Sed & vos non minus diligitis militem, qui primo quidem in bello terga dedit, & postea rediens premit fortiter hostem, quam eum qui nunquam terga dedit, & nunquam aliquid fortiter gessit. Sed quid multa? cum ecce nos ei apud pium imperium vestrum, fili carissime, fidem dicimus. Ecce nos pro illo vadem offerimus: tantum sic agat erga eum clementissima & serenissima pietas vestra, vt alii sub tegmen miserationis vestræ, hoc comperto, alacrius confluant, & per interuentionem nostram quasi per immobilem pontem ad vos certatim transitum faciant. Siquidem hic in signum est ad apostolica tecta quoddam positus, cunctos ad vos terrigenas aut bene dispositus inuitabit, aut a vobis male tractatus terrebit. Nam difficile esse credimus apud pietatem vestram quemquam per alios obtinere, quod per Petrum & Paulum apostolorum eximios non poterit impetrare. *Data vt supra.*

## EPISTOLA XXVIII.

## IOANNIS PAPÆ VIII.

AD GVAIFERIVM PRINCIPEM SALERNITANVM.

Laudat eius fidei constantiam erga sedem apostolicam: Adelgiffi & complicum fraudes detestatur, suumque & aliorum ecclesiasticorum auxilium contra Saracenos ei pollicetur, & hortatur vt in fide persistat, vtque episcopum Surrentinum ad se mittat.

*Ioannes episcopus Guaiferio principi Salernitano.*

**G**LORIOSÆ nobilitati vestræ, quam spiritualibus vlnis amplectimur, & dilectionis semper sinibus fouere non mediocriter anhelamus, condignas gratias agimus: quoniam in fidei petra statuens constantiæ pedes, nec flu-